





H 93746

天  
文  
圖  
書

明  
史  
紀  
事

申  
戊

開基卷之三

起戊申  
止辛亥

大明洪武元年

是歲春正月

四日





太祖祭告天地即皇帝位於郊壇南群臣朝賀定天下之

號曰大明建元洪武遂詣太廟追尊四祖為皇帝號皇

后置大社稷于京師冊妃馬氏為皇后立世子標為皇

太子俱布告天下加中書左丞相李善長太子少保右

丞相徐達少傅章溢御史中丞諸功臣進爵有差先是

京師多雨雪城中陰晦是日天氣澄清風和景霽香霧

上凝下靄獨露中星臣民忻然相告天開景運徵太平

之遇云○十一日壬午胡廷瑞等攻建寧元守將同僉

達里麻叅政陳子琦集僚佐謀曰聞大明兵驍勇自入

定建寧

杉關諸鎮皆瓦解其鋒不可嬰今吾城中軍士不下萬餘第儲富尚可以守不可與戰彼持日久必引兵退因而乘之或可得志遂備禦甚堅我數與挑戰不出廷瑞遂及何文輝督衆攻益急達里麻懼夜出城詣管納款越壬辰總管翟也先不花亦出降廷瑞怒欲屠城文輝贊曰吾與公同受命爲安百姓今以私忿殺降可乎廷瑞整兵入城不擾械陳子琦於京獲將士九千七百九十餘人馬二百七十餘疋銀一萬六千三百餘兩糧九萬八千六百四十餘石命指揮費子賢領兵守之○時陳友定據延平如故朝廷屢遣使招之不下及是湯和廖永忠等進兵沐英亦自鉛山來會直抵城下隔水而

定延平

陣乃遣一枝兵渡水攻其西門甚銳友定震怖不敢出部下數請開門一戰不從反疑其有貳心殺部將蕭判以厲之其下遂大潰是月庚子克之叅政文殊海牙等降執友定及其子海以歸○是月楊璟周德興張彬等圍永州先是元左丞鄧祖勝守永聞大兵至遣使告急全州守將平章阿思蘭發兵赴援德興等大破阿思蘭俘九十餘人獲馬二十疋遂進兵祖勝率衆出南門迎戰德興擊敗之俘其將王鑑祖勝亟入城自保時元兵有自廣西來援駐東鄉倚湘水列七陣勢甚盛楊璟遣鎮撫呂琛指揮袁子明等又大敗元兵獲萬戶丁武等一千二百餘人馬一百疋遂圍永州○二月甲寅楊璟

遣千戶王庭復寶慶先周文貴陷我寶慶及王庭兵至  
 朱貴離文貴據險拒戰廷擊敗之斬參政賀興隆等已  
 而文貴復來援永州張彬又敗之斬將朱院判獲元帥  
 等六人指揮袁子明又破其兵於湘鄉戰死百戶周迪  
 等遂定寶慶遂分遣周德興張彬畧全州○三月壬申  
 克全州阿思蘭率衆奔象州遂畧道州萬戶吳友遜降  
 及寧州土官李文卿藍山心帥黎茂陵亦以桂陽常寧  
 降又攻武岡州降其守將曾權○是月胡廷瑞等克興  
 化遂遣建陽降將曹俊疇往招汀州寧化連城等處元  
 守將陳谷珍納款於是泉州漳州潮州諸郡相繼降福  
 建悉平○是月遂命平章廖永忠為征南將軍參政朱

亮祖副之自福州取海道進兵廣東勅云王師義在不  
 殺期以拯民且諭之曰廣東要地惟在廣州廣州既下  
 將循海州郡可傳檄而定海北以次招徠留兵鎮守仍  
 與平章楊璟會兵取廣西用兵方畧率用是道肅清南  
 服在此一舉又勅贛州衛指揮使陸仲亨及胡通統本  
 衛及南雄贛州等衛兵以犄角永忠之師因諭仲亨等  
 曰近命楊璟等以兵由湖廣取廣西廖永忠等以兵由  
 福建取廣東今奉爾率贛雄南安之兵由韶州直擣英  
 德肇慶廣東既下合兵以取廣西先勢既振勢如破竹  
 但撫輯生民無縱侵掠○又遣都督康茂才統步騎往  
 山東益大將徐達等兵聲進取中原○是月徐達克東

陳

州廣取

梁汴

昌路斬其將申榮王元輔遂進克棣州攻樂安元將俞  
 勝遁去郎中張仲毅以城降命部將華雲龍守之橫廓  
 帖木兒自澤州退保普寧關守澤潞達遂悉師而西○  
 三月壬午永忠等舟師入廣東時元左丞何真守廣州  
 永忠即遣人以書招真壬辰兵次潮州真遣都事劉克  
 佐以其印章并籍所部郡縣戶口兵馬錢糧奉表願歸  
 ○徐達等引兵上黃河克永城歸德許州遂取汴梁守  
 臣李景昌即克遁河南又進取陳州守將左君弼降先  
 是君弼感 太祖貽書及是聞王師至遂來歸以為廣  
 西衛指揮僉事○四月辛丑朔永忠等兵次東莞何真  
 率官屬詣軍門乙巳永忠進次虎頭山門元將張元帥

平東廣

率所部降戊申兵至廣州之龍潭元將盧左丞又遣鎮  
 撫劉成納款獲舟五百士卒二千五百餘人馬三百疋  
 糧五千餘石廣州平時陸仲亨胡通統兵亦至乃畧英  
 德清遠曲江連州肇慶等處守將張鵬程遁走遂以兵  
 會永忠于龍潭永忠以胡通統兵守廣州時廣州叅政  
 邵宗愚據三山寨遣人約降而心懷携二永忠遣兵攻  
 破其寨遂禽宗愚及其黨於廣州市斬之因馳諭九真  
 日南朱崖儋耳三十餘城皆納印請吏廣東悉平遣人  
 送真詣京永忠復引兵入廣西真至京賜勅褒答授奉  
 中大夫江西等處行中書省叅知政事○是月丁巳克  
 永州先是楊璟圍永州久不下遂於各門築壘以困之

祖勝屢出戰皆敗尋會其萬戶何義千戶劉仲等又敗其將周壽等于東鄉橋至是城中食乏祖勝度力不支飲藥死璟等四面力攻至夜三鼓拔之執叅政張子賢元帥鄧思誠其百戶夏昇以城降以丁玉統兵守之璟遂引兵向靖江柳林○時淮漢迤北郡多未附

太祖手勅御史大夫鄧愈統襄陽安陸景陵等處兵往討之愈率指揮王成吳復等攻克唐州又進兵南陽擒國公史克新等二十七人獲軍士千五百人馬一百五十餘疋○是月達等進兵河南路河南路多山寨遣傅友德首擊福山寨降右丞潘莽兒尋攻神頂寨守將張知院降攻仙人寨降其叅政牛某等八人進攻陵青黑山

取河南路

諸寨守將皆遁走大兵遂臨洛水之北塔兒灣時元將詹同脫因帖木兒領兵五萬迎戰常遇春單騎直衝其陣敵發二十騎攢槊刺之遇春發一矢中敵前鋒大呼殺入達麾任亮康茂才耿炳文以兵乘之殺獲無算詹同等收餘兵奔陝州大兵進營河南城北門是時趙庸率步騎自中灣渡河入虎牢關遂會曹良臣至塔兒灣協破詹同等五萬之衆遂大會於城北於是李克彛出走平章梁王阿魯溫出降河南平乘勝下洛陽以趙庸守之因遣任亮招諭嵩州下之以亮守嵩州○時陝西州郡為李思齊張思道即驍二人所據思齊聞我師克河南乃邀張思道駐兵潼關以拒我未幾營遭火燬遂

移軍退守葫蘆灘以部將張德欽薛穆飛等守關而已  
馮宗異克陝州遂入潼關進攻李思齊營思齊棄輜重  
奔鳳翔 太祖因貽思齊書反復諭以去夷就華當待  
以漢竇融之禮不報我師又克華州進攻裕州元平章  
郭雲力屈被執 太祖嘉雲忠義釋而用之雲勇力饒  
謀畧時河南諸郡皆下雲獨嬰城爲守招之不從後以  
孤軍戰始敗○是月癸亥立山東行中書省調江西行  
省參政汪廣洋爲山東參政以翰林院學士陶安爲江  
西參政出中書省參政蔡哲爲福建行省參知政事領  
福興泉漳汀邵諸處遣指揮沐英往建寧節制邵武延  
平汀州三衛○五月調都督郭子興等守潼關先是宗

異克潼關言於大將徐達曰潼關三秦門戶最爲要害  
李思齊張思道日夜覬覦宜擇將益兵爲戍守達遂以  
郭子興康茂才于光守之子興等至即造浮橋以便餉  
道招蒲解以遞蔽潼關秦人自是不敢東出○是月駕  
幸大梁蓋議建都及取元都也以何文輝爲河南衛指  
揮使○是月徐達引師至陝州遣將王臻等攻拔平毛  
葫蘆山及汝州劉參政等寨李克彞懼始棄河南奔陝  
又自陝入關據岐山推李思齊爲總管分遣部將忽林  
赤脫脫張意據盩厔商高據武功任從政據隴州互相  
應援以拒我師○六月永忠等統兵由肇慶泝江而上  
遂抵梧州元守將達魯花赤拜住出降時元吏部尚書



張翔及普顏帖木兒以便宜行事廣西至藤州聞王師至募人迎戰無一應者既而開州守吳庸出降翔等率部下百餘人走鬱林朱亮祖勒兵追之普顏帖木兒戰死張翔亦赴水死亮祖遂駐師滕州於是潯貴等州及容州同知明安普化率父老迎降暨寧縣達魯花赤賈等鬱林知州張那海同知王楚金等皆降亮祖遂分道由府江進克平樂兵次南寧元上浪屯田千戶宋真執守將平章咬住等請降永忠悉收諸司印章即以真守其城遣指揮耿天璧等討象州元平章阿思蘭遣部將李左丞來戰天璧擊破之思蘭窮蹙乃率所部詣營降獻銀印三銅印三十七金牌五永忠等自平樂會揚

璟于靖江遂屯兵東門之象鼻山軍威大振壬戌克靖江初璟遣周德興先領兵抵靖江設柵據險絕其聲援璟既平全州遂以兵抵城下屯北關張彬屯南關合攻二十日元平章也兒吉尼等固守不下於是璟召諸將校論之曰彼所恃者西濠水耳如其先取閘口決其阻岸則破之必矣乃遣指揮丘廣奪閘口關殺其守堤兵決其濠水因築土堤接城以通士卒遂破其北門月城及水隘等處俘斬百餘人復攻其西門不利既而也兒吉尼驅兵出南門迎戰胡海擊敗之獲百戶皮彥高楊天壽等璟陰使彥高購其把水元帥張榮榮部下裴觀以書繫矢射城外達璟營約降期以六月壬戌來會是

夜二鼓觀縋城出見璟備言儲積空虛人無關志可立  
 取狀璟給觀白皮帽百餘為識遣之約四鼓從寶賢門  
 入璟命吳永寧先登胡海繼之自八角亭梯墉以入也  
 兒吉尼聞變出走追至城東伏波門執之歸于京師都  
 事趙元隆陳瑜劉永錫廉訪司僉事帖木兒普花元帥  
 元禿蠻萬戶董丑漢府判趙世傑皆死之初兵攻城為  
 守者所詬嘗恚曰城破之日當悉屠之及是璟下令嚴  
 戰軍士百姓安之遂以兵進克柳州遣使招諭兩江溪  
 洞○秋七月己巳朔左江太平府土官黃英傑右江田  
 州府土官岑伯顏各遣使齎印章詣軍門降廣西悉平  
 璟還兵乃定彬州詳璟本序○是月命黃彬移鎮袁州撫定

山寨之逋逃者○時鄧愈進兵隨州元守將右丞王誠  
 降遂攻麻張新寨及信陽玲瓏寨皆平之

太祖復手書示愈不必往河南征進只總兵勦平南陽等  
 處未附山寨使民安集愈受命即遣指揮王成等擊破  
 光石腦山寨駐營小西門又令千戶張佐攻大西門又  
 遣人據羊卧嶺斷其水路垂即拔之禽其副樞張成同  
 簽劉敬等六十餘人斬之俘獲三千人於是葉舞陽魯  
 山等處相繼降附南陽悉平○是月 車駕發大梁授  
 都督馮勝右副將軍守大梁時潼關以東皆定乃勅諸  
 將渡河北取元都大將軍徐達等自陳橋入見  
 太祖諭之曰朕與公等率眾渡江誓除禍亂以安天下如

連破河比諸國

肆行屠戮達天虐民朕實不忍爾諸將帥多以爲戒克城之日毋虜戮毋焚蕩毋妄殺人必使市不易肆民安其生凡元之宗室皆善待之庶幾上答天心下慰民望以成朕伐罪救民之志有不恭命者必罰無赦諸將謹受命○大將徐達等自中爨渡河而北薛顯俞通源自關陝以兵渡河攻衛輝拔之元守將龍二出走彰德我師進克獲嘉降其守臣胡仲信俾守衛輝又向彰德龍二復出走其步將楊義卿以城降得船八十餘艘進兵克磁州攻廣平元平章周顯先遁遂向邯鄲守臣都文王率父老出降至趙州獲元豹邦傑及部將侯僉院等傅友德進克臨清獲元將李寶臣都事張處仁等收爲

嚮道達乃移檄東昌諸將各領馬步舟師大會於臨清進取元都遂遣顧時浚聞以通舟師尋引步騎拔德州時陳灌督運以餉軍調度有方師呼宿飽云○閏七月取長蘆左僉院遁去抵直沽獲其海舟以造浮橋濟師常遇春等率舟師並河東西進步騎由陸路入時元丞相也速等捍禦海口望風而潰至河西務敗元平章俺普朶兒只進巴等擒知院哈刺孫及省院將校二百餘人獲馬百疋糧二千六百餘石俺普等遁去郭英以兵距通州三十里爲營深溝高壘作持久計衆請速攻英曰不然吾師遠來敵以逸待我攻城非吾所利宜出其不意破之明日大霧英以千人伏道傍約曰我師稍却

敵必來追即起截之英乃率精騎三千直抵城下挑戰元將五十八國公統敢死士萬餘張兩翼而來英與戰良久佯北敵果來追伏兵從中邀截英還兵力戰遂敗之斬首千餘級元知院卜顏帖木兒戰死禽其宗室宇羅梁王是月二十七日丙寅夜三鼓遂破通州未幾大將徐達率華雲龍等兵亦至元君得報大懼遂集三宮后妃太子欲北走達旦召群臣集端明殿議時丞相失烈門知樞密院事黑厮宦者趙伯顏不花等皆諫元君宜死守不聽即命淮王帖木兒不花丞相慶童等守燕京不花又慟哭諫曰天下者世祖之天下也陛下當以死守柰何去之竟不從夜半開建德門出居庸關北去

如上都○八月二日辛未克燕都時大將徐達攻破齊化門遂入之登其城樓執元留守淮王帖木兒不花丞相慶童平章迭兒必迭朴賽因不花右丞張康伯中丞滿川右丞丁敬等戮之侍制黃殷仕不屈赴井死都總管郭允中亦死獲鎮南威順諸王子六人收玉印二玉璽一遂封其府庫圖籍寶物及故宮殿門官人妃主令宦侍善護之達軍令帖肅民不見擾人謂曹彬下江南伯顏入臨安不是過也○是月楊璟還京湯和亦自平廣東還○九月元右丞王保保自河中寇潼關守將郭子興禦之部下指揮于光持矛大呼橫衝其陣敵衆披靡子興乘之元兵大敗李思齊等自是不敢復犯潼關

○是月徐達分遣孫興祖俞通源等進克永平常遇春  
傅友德等畧保定中山即定州河間等處俱下之○冬十  
月詔改燕京爲北平府置燕山等六衛以都督孫興祖  
華雲龍守之旣而命常遇春克真定元守將孫平章出  
走○時元都旣平達等遂謀進取山西會御史大夫湯  
和乎章楊璟俱平廣西廣東班師 太祖命二人俱偏  
將軍統兵往山西助達又遣右副將馮勝帥師入山西  
○是月己巳馮勝兵渡河克武陟至懷慶元平章白鎖  
住等棄城走澤州勝遂入懷慶獲將士八百餘人以紀  
斌守之尋引兵至太行山碗子城破其關元兵潰進攻  
澤州走其平章賀宗哲破磨盤寨擒叅政喻仁戮之拔

潞州至猗氏擒元右丞賈成轉克平陽擒李茂先又克  
絳州擒田保保俘將士五百人獲馬三百匹己而元擴  
廓帖木兒遣部將韓札兒來侵澤州楊璟遇札於韓店  
大戰敗績璟恚之遂發憤勅兵以圖報稱○十一月立  
潁州衛命李勝爲指揮僉事守之先是潁州遭拜咬兒  
之亂民多流離地爲荒廢 太祖自大梁還過其地憫  
之遂有是命勝撫集流移民始復業○又以吳復爲安  
陸衛指揮使○是月徐達等發燕山道真定趨山西所  
遣擇人守要害分遣傅友德薛顯等克平定州擒其將  
湯同僉取七塚寨陸聚攻車子等寨及井徑鳳山城山  
鐵山寨皆降之復取故關山寨南王寨大兵直趨大原

○十二月嚴州衛指揮耿天璧攻海南海北州郡悉平之○時元主度我大將既發北平因有乘虛窺視之志乃命擴廓帖木兒率師遠出大原取道保安歷居庸關以侵燕山達聞之召諸將諭之曰此不足慮北平孫都督總六衛之兵足以鎮禦我與爾等乘其不備直抵大原傾其巢穴則彼進不得戰退無所依兵法所謂扼亢擣虛也若彼還軍救大原則已為我牽制進退失利必成擒矣諸將曰善遂引兵徑趨大原城下擴廓至保安得報還兵救大原鋒不可當傅友德薛顯等擊之兵未及接萬騎突至友德率敢死士數十餘騎衝却之擴廓遂軍于城西指揮郭英憑高望之謂常遇春曰彼兵多

而不整營大而無備可夜襲也常遇春可其計因謀於大將徐達曰我騎兵雖集而步兵未至何以能戰莫若遣精騎夜劫其營其衆可亂主將可縛也達然之會擴廓部將谿鼻馬潛使人來約降且請為內應達大喜遂先以五十騎伏城東十里許約曰舉火鳴砲即起至夜郭英率十騎潛入敵營舉火鳴砲伏兵亟起遇春等引兵繼至鼓譟之聲相聞敵衆驚潰反相殺傷擴廓方燃燭坐帳中聞變倉卒不知所出急踰帳後出乘驃馬從八十騎追去友德勒兵追至土門關不及而還谿鼻馬率餘衆出降遂定太原得兵四萬餘人馬四萬餘疋擴廓奔大同尋走甘肅○未幾傅友德薛顯將雄武寧國

橫海等衛步騎邀擊賀宗哲於石州破之淳忻霍絳等處皆平○是月使臣都事汪河自陝右還河出使北虜被留六年抗厲不屈至是擴廓敗走河得釋完節如朝太祖命為吏部侍郎河因備陳虜中事情上方畧後擴廓帖木兒竟由以取敗○是月遣中順大夫漢陽府知府易濟持詔往諭安南

洪武二年○春常遇春克大同路平章竹貞棄城走追擒之傅友德巡太和嶺之西北次宣德府敗元將脫列伯平之諸將遂會于太原

太祖遣使持詔慰答之詔曰近者大夫湯和定浙左平閩中平章楊璟清湖湘定廣西班師還朝未曾定賞為大

將等滅胡未還故也於是再遣各官征進璟出澤州趨潞中與賊相距雖少筭以累軍此亦古今兵家常事又何慮焉太原之捷得以分彼勢可謂奇矣今徧將軍和即湯居馮宗異之下偏將軍璟楊居和之上協力同心剪除餘虜務以殄戮毋以細故為慮於是諸將遂謀取陝○二月立皇陵碑○是月楊璟還鎮唐州先是以指揮朱某守唐州已而乘大軍西征遂殺朱指揮以叛時蘇家寨賊老馬劉及南陽旁縣皆應焉 上遣詔諭大將軍徐達承制遣璟率左丞周凱及張參政等自太原還兵征之璟至首論脅從者以散其黨乃以兵向唐州一鼓而拔遂留璟唐州鎮禦南陽復平未幾元將也先

皇明通志卷之三

卷之三

三

寇通州守將曹良臣以計走之先是徐達至真定會遇  
春于柳亭調諸將分守要害乃以曹良臣潘敬趙興貴  
等守通州至是也速來寇以萬騎營於白河時城中守  
兵僅千餘人良臣謂其部下曰吾兵少不可與戰彼衆  
雖多然亡國之后屢挫之兵可以計破乃密遣指揮仵  
勇等於沿河舟中各樹赤幟亘三十餘里鉦鼓之聲相  
聞也速望見驚大兵至即引衆遁去良臣復出精騎渡  
北河追之不及而還○時張思道據鹿臺傅友德攻敗  
之思道遂西走達引師發大原還平原次河中乃造浮  
橋選士馬以從先遣副將常遇春參將馮宗異等渡河  
趨陝西攻西安時兩敵夾武功東川而陣李思齊在其

西日數挑戰我師蓐食以俟將耿炳文等卧不解甲蟻  
蝨生身兩敵力不能支遂相與遁去思齊奔鳳翔思道  
奔涇陽各治兵以拒我師○三月庚戌大兵駐西安列  
營長安城北元平章王武率官屬士民迎降達以耿炳  
文鎮長安遂畧鞏昌臨洮延安平涼寧靜莊浪等處又  
遣汪興祖攻武州朔州皆克之擒知院馬廣等六百餘  
人家屬三千三百餘口以興祖兼山西行都督府守禦  
大同○馮宗異以兵向鳳翔李思齊率所部奔臨洮先  
是太祖遣使持書至鳳翔諭思齊有降意被其養子  
趙琦與其麾下誘之使西入吐蕃思齊感之及大兵至  
思齊懼遂出奔○四月大將達臨鳳翔遂會諸將議所

安西

翔鳳取



向諸將咸以張思道之才不如思齊慶陽易于臨洮欲先自幽州取慶陽然後從隴西攻臨洮達曰不然慶陽城險而兵悍未易猝拔臨洮之地西通蕃夷北界河湟得其地足以備戰鬪土產足以供軍食今以大軍蹙之思齊不走西胡則束手自縛耳臨洮既下則旁郡附諸將皆曰然遂進軍隴州秦州克之抵鞏昌降其平章梁子忠總帥汪靈真保等移郭子興守鞏昌遣馮宗異直趨臨洮思齊窮迫遂請降以銀印等物及騎二萬獻趙琦亦率衆來歸達械思齊赴京入見太祖諭曰元將倔強北奔者多思齊能順天愛民視彼爲優命爲江西行省左丞不之官食祿於京張思道弟張良臣守慶陽

聞臨洮不守亦降已而將軍顧時戴德克蘭州○五月達引兵往平涼次于涇陽○是月倭賊出沒海島擾害蘇州崇明等縣沿海之地皆患之大倉衛守禦指揮僉事翁德帥官軍出捕殺傷甚衆奏至陞本衛指揮副使官校以下一千二百四十七人賞綺帛五十疋銀二千五百六十九兩戰溺死者加賜錢布未仍命德往捕餘寇殲之自是倭不敢復至○是月張良臣復叛先是良臣聞兄思道走寧夏爲廣廓帖木兒所執故降至是乘大兵他往恃其城高險下多井泉可據兵多精悍又養子七十人皆善戰且倚王保保賀宗哲及平章姚暉潛爲聲援遂反達聞報亟自涇州還兵時良臣多黨與乃

分兵抄其出入之路以俞通海張精騎襲其西傅友德  
畧其東陳德畧其南顧時畧其北連會乘趨慶陽圍其  
城四面攻之良臣數挑戰不利○時也速復侵通州會  
常遇春偕徐達入秦 太祖亟命遇春帥所部軍東還  
以李文忠為副將擊之遇春遂搗永平進趨化度鹿兒  
嶺敗元將江文靖于錦川獲士馬千計次全寧也速逆  
戰之進破開平元君北奔追至滦河斬宗王慶生等俘  
宗王三人進兵大興文忠度虜必走乃分兵千餘伏其  
歸路虜果夜遁伏起大破之斬其將昂住凡得軍士萬  
人車萬輛馬二千牛羊五萬師還七月七日常柳河川  
常遇春以疾卒 上聞之震悼遂命文忠代將其還燕

文忠遂謀趨陝西會兵慶陽○是月元王保保即擴廓  
遣韓札兒攻破原州欲以應張良臣守將指揮陳壽載  
沒達與馮宗異傅友德等議曰駙馬關當原州之衝如  
以兵守其關復以大軍臨之以扼原州彼自計無所施  
矣乃遣左丞徐禮駐兵駙馬關馮宗異亦駐兵駙馬關  
之東去慶陽三十里與禮緩急相應復令傅友德薛顯  
帥兵駐靈州甯正守邠州葉國珍守彭原以遏之既而  
札兒又攻陷涇州宗異追擊之札兒走元賀宗著攻鳳  
翔之北門守將張隆擊敗之時大兵環攻慶陽日大張  
良臣困圍密遣人赴寧夏起于思道求援為我兵所獲因  
獲其兄思道所遣王讓等八人叩之亦言王保保已往

復平慶陽

永昌自是慶陽音問絕城中乏食士卒饑病至糞入  
汁丸泥嚙之達遂攻城益急平章姚暉獻門納師八月  
癸未大兵入城良臣父子迫投井中引出斬之誅其黨  
數百人慶陽復平遣陸成來獻捷○八月傅友德薛瑄  
來會達於原州追敗王保保於六盤山保保絕塞遁去  
會賀宗哲又寇蘭州達遣顧時馮宗異率衆三萬往擊  
之宗哲亦北遁以宗異鎮慶陽節制各鎮軍馬規取銀  
餉徇河外諸郡皆下之陝西遂寧○以康茂才鎮太原  
先是太祖遣吳禎諭達曰如河中已寧則以都督康  
茂才所部卒三分之一茂才仍帥其二鎮山西太原諸城  
悉聽節制其一增守陝西遂有是命○達等帥師還京

陝西平

李文忠接大

以孫琪朱祐統兵守平涼○是月李文忠以兵解大同  
圍先是文忠領兵遂以七月癸亥發北平赴太原會大  
將討張良臣至中途聞慶陽已平適元君比走屯蓋里  
志圖恢復遣將脫列伯孔興以重兵攻大同急文忠謂  
副將趙庸等曰吾與若等受命而未闔外之事有利於  
國專之可也今大同受圍若候進止吾恐敵益猖獗難  
以復制最失事機僉曰然遂由代入鴈門關九月師次  
馬邑猝遇元邏騎數千文忠奮兵擊破之擒平章劉帖  
木進次白楊門擒四大王時大雨雪文忠疑敵有伏乃  
以數騎出入山谷巡視之前軍已駐營去敵五十里文  
忠至命遷之復前五里許阻水列營密遣人間道入大

同報知守將汪興祖是夜脫列伯果悉銳卒來戰文忠令將士林馬濬食堅壁不動獨出兩營兵與之挑戰相持自寅踰辰度敵衆飢疲乃出大軍分左右翼文忠身當前鋒督兵奮擊大破之擒脫列伯獲士卒萬餘輜重馬疋無算復以兵追孔興至東勝州莽哥倉而還已而孔興走綏德爲其部將殺之來降元主自是氣挫不復有南侵之志○是月占城國王阿答阿者遣其臣虎都蠻入貢時征南將軍廖永忠副將軍朱亮祖亦自廣東凱旋中原南北皆定獨西蜀夏主明昇未下昇年弱不振母彭氏及其丞相戴壽聽國政 太祖不忍加兵命楊景祚招諭之明示順逆禍福明昇即欲入朝牽於羣

議不決璟乃還復以書曉之竟不報○是月大同守將汪興祖帥師伐興和興和地在萬全都司之外元之上也都也地宜牧馬可種稻麥元氏居民甚蕃庶乃陰山之脊中國自鳳凰山西南有沙城又度數山岡便至興和爲我國家宣府之保障在焉故伐之○冬十月初製鐵券及織誥勅之則○十二月達等各上所佩將印士卒各歸諸衛所遂大賞諸將功賜徐達白金五百兩文幣五十表裏廖永忠白金二百五十兩文帛二十表裏胡廷瑞楊璟康茂才各白金二百五十兩文帛十七表裏傅友德薛顯各白金二百兩文帛十九表裏馮勝顧時朱亮祖郭子興吳禎陳德曹良臣趙庸等各白金二百

成庚

兩文幣十五表裏其餘各論功行賞有差○是月元王保保襲蘭州守將張溫禦之守鞏昌指揮于光赴援而死是時王保保窺大兵南還自甘肅奄至城下溫會諸將校謀曰彼悉衆襲我我兵寡難與爲敵然彼遠來不及知我城中虛實我乘暮擊之可挫其鋒彼不退則固守俟援於是整兵出戰保保亦少却達旦溫斂兵城守保保以兵圍城數匝溫堅守不出防禦甚嚴時于光在鞏昌聞之將兵來援至蘭州馬蘭灘猝遇敵戰敗被執賊以光至城下使呼張將軍降光大呼曰公等堅守徐總兵大軍行至矣城中聞光言氣益壯光遂遇害  
洪武三年○春正月命徐達爲征虜大將軍以馮勝爲

征北

副將軍帥師自潼關出西安以搗定西李文忠爲左副將軍同趙庸由北平經萬全出野狐嶺至興和蓋是時東北諸胡多從元主北遁未遠又王保保賀宗哲皆勅寇爲西北患故議北征云○二月北平守禦華雲龍克雲州獲元平章火兒忽荅及右丞哈海等大同守禦金朝興克東勝州獲元平章荆麟等十八人○三月蘭州圍解守將張溫陞都督僉事先是蘭州爲王保保所圍甚亟溫竭力相持數月溫屢乘其怠擊之保保不利及是聞大兵且至乃引退事聞 太祖嘉之遂有是命○時湖廣慈利土酋覃仝結諸洞爲亂勅楊璟帥師討之勅云蠻賊恃山溪險阻乘時竊發出沒無常若誅其黨

必深入山谷虛損上馬得不償費今以師臨境但擊之使遠去不令出擾州縣可也不必窮其巢穴更宜約束麾下慎勿逐利輕動比至璟直抵單崖寨崖率衆迎敵璟擊敗之乘勝深追至半山山三面峭絕一路俯江僅一隘道可一人行官軍不能進遂即山營焉未幾崖以三千人下山挑戰又敗仍遁去璟以兵逼之崖詐遣人乞降璟遣部下黃永謙往被賊留因鞠我營中虛實益阻險自負璟欲為坐困計遣使請益軍餉 太祖命叅政戴德以兵往協討遂降勅讓璟違命之罪勅云爾違吾言妄動不能平亂既已失策又中其詭計以階部將爾之智勇何在甫命叅政戴德以兵從爾凡諸小寨限

功責揚

以日月平之仍撫綏慈利等處人民俾安生理毋致驚疑若再違朕命併以前潞州失利治之四月勅至璟惶懼遂督諸將力攻之賊遁入溪洞境內稍安遂還軍○是月詔濠州爲中立府雍中都○大將徐達兵至定西古城擴廓帖木兒盛兵來戰達奮擊大破之夷其營落獲王公以下百餘人士卒八萬斬首三千級輜重駝馬無筭帖木兒以殘衆西北走 太祖以此虜終爲邊患遣使以書招諭之不報是後也虎賁指揮使潘毅卒于陣右丞胡得濟戰於莊浪失利達執其部下千戶等十餘人斬之軍中械得濟於京 太祖飭之曰得濟固是慢功然前守信州救諸暨守新城論功宜除其罪曲赦

之仍命於達部下聽調○左副將軍李文忠進攻察罕  
惱兒擒其平章祝貞遂次于白海子之駱駝山遇元太  
尉蠻子平章沙不丁朶兒只八剌等來戰大敗之進攻  
紅羅山元將楊思祖等以衆萬餘人降遂遣將軍孫興  
祖等向三不刺川五郎口圍應昌○四月二十八日元  
主妥懽帖陸爾殂于應昌大尉完者觀音奴潛以元主  
率北歸○五月李文忠趙庸兵次開平執元平章上都  
遂于是月十五日昧爽進襲應昌拔之元太子愛猷識  
里達臘北遁俘元嫡孫買的里八剌并后妃官嬪王子  
黑的罕國公答失帖木兒平章阿里馬溫海牙獲宋元

呂應兒

下璽金寶玉圖書玉策玉鎖鎮圭大圭玉笋玉斧及馬  
騾無數文忠復引兵過中興擒元將江唐國公降其部  
下軍民三萬七千餘又至苦脫孫追大尉蠻子軍擒元  
平章伯答兒他物稱是是時元亡漠朔無王庭蓋元上  
都以紅羅山爲之蔽紅羅山有警言上都爲之援文忠  
以次攻拔故全勝是役也守將孫興祖指揮孫虎皆戰  
死○徐達等旋師定西遂向鳳州擒元李叅政等二十  
餘人尋遣傅友德爲前鋒李思齊左君弼趙琦等各率  
所部兵從之自秦州南出一百八渡克畧陽擒平章蔡  
琳遂入沔州又遣指揮金興旺張隆等領兵由鳳翔入  
連雲棧與友德等連兵攻興元守將劉思忠知院劉慶

中漢取

祥以城降友德以軍食不繼乃還軍西安以金興旺張龍二人守之漢中平○六月以蘭州指揮僉事張溫兼陝西行都督府事○是月大將徐達及李文忠等遣使奏捷及獻俘 上頒詔以諭迤北臣民其元嫡孫竒渥溫買的里八剌至京中書省奏議獻俘太廟 上不忍詔具本俗之服以見至日 上服皮弁御奉天殿令百官朝服侍班引見行五拜禮畢賜以中國冠服及第宅廩餼封崇禮侯已故庚申君賜謚順帝其所俘元后妃等遣還沙漠○秋七月夏主明昇忿失興元遣將吳友仁率衆三萬窺漢中以報興元之後友仁攻興元守將金興旺張隆擊却之明日復戰興旺面中一矢拔矢復

戰斬敵數百級時城中守兵纔二千人興旺等以我力寡且斂兵入城遣人從間道走寶鷄請援友仁乃決濠填塹攻城益急興旺等嬰城拒守間以巨稜播石自城上擊敵多被傷死者時徐達駐兵西安得報即出師屯益門鎮遣傅友德領兵三千趨黑龍江夜襲木槽關及至斗山砦友德乃令軍中人持十炬行山上燃之友仁軍望見驚大兵且至遂乘夜遁去自是興旺張龍二人威譽日達夏人震疊不敢復犯興元徐達仍還軍西安繼而守瞿塘將莫乎章亦率水陸兵東寇歸州守將陳聞出兵南門大破之斬首三百級俘八十人送楊璟斬之夏人東北出兵各敗劔遂據險爲自守計○八月都



督康茂才從征漢中卒于道○是月徐達自西安帥師西征吐蕃克河州遣取天壁招諭元帥何鎖南普化兒只等皆納印請降遂攻元卜納王追至阿撒里忙打必失惱兒禿魯干擊其院使馬密等敗之天壁復同臨洮指揮趙琦以兵踰禿魯干等地卜納王懼使太子及馬密等齎印牌來降於是河州以西日朶烏思藏等部悉願內附王師遂極甘肅西北數千里始還○時瓜哇國西洋鎖里國俱遣使入貢○十月命湖廣左丞周德興為征南將軍統兵討慈利土酋覃屨平之初楊璟征屨屨震怖走匿山谷至是又出為寇故有是命德興至覃屨復道○十一月壬辰左副將軍李文忠等進平胡表

稱賀

文

時大將軍徐達亦自西征還兵遂大封功臣

賜爵祿誥券有差以中丞劉基入開國例封誠意伯○

十二月以湯和為征西將軍帥京衛荆襄等兵由瞿塘

趨重慶廖永安為副將軍周德興為左副將軍傅友德

為征虜前將軍帥河南陝西步騎由秦隴趨成都顧時

為右副將軍仍命汪興祖王簡楊璟等各率水路兵以

從和時明昇據蜀竟阻聲教時出寇歸州漢中等處至

是命將往討上諭諸將曰行師之際在肅士卒嚴紀

律以懷降附無肆殺掠昔王全斌之事可以為戒卿等

慎之又密諭友德蜀人聞吾西伐必悉其精銳東守瞿

塘北阻金牛以樞我師若出其意外直持階文門戶既

隳腹心自潰友德頓首受命先是夏人自謂瞿塘天險  
遣平章莫仁壽守之以鐵索橫斷關口及聞王師出果  
遣丞相戴壽平章鄒興副樞飛張天等益兵爲守壽乃  
扼三峽之峻北倚羊角山南倚南城寨鑿兩岸壁引纜  
爲飛橋三於上平以木板置砲石木竿鐵鏡等物傍橋  
兩岸仍置砲石時加鼓譟操練又遣人北守金牛以拒  
我師然料敵已入 太祖神筭矣○是月祿其降臣李  
思齊潘原明李伯昇王溥等並食中書平章祿不署事  
仍令其子孫世襲指揮同知等官思齊羅山人已酉降  
尋領兵擣王保保于定西有功賜文綺及帛九年卒命  
其子世昌爲指揮原明泰州人是歲給歲米七百五十

石十四年往署雲南布政事有撫輯勞十五年冬卒伯  
昇泰州人亦歲給米七百五十石五年任征南右副將  
軍有平蠻功十二年出理漳州軍務尋召還卒溥未詳  
其里歲米與思齊俱同

亥

洪武四年○春正月元遼陽行省平章政事劉益以遼  
東州郡地圖并籍其軍馬錢糧之數遣右丞董遵俞院  
楊賢等奉表來降表云國破家亡顧孤忠之何益勢窘  
力屈惟有德之是依 太祖嘉其誠遣斷事吳立持詔  
往答之褒辭有云雖漢竇融何專前美遂置遼東衛指  
揮使司於得利羸城以益爲指揮同知益徐州人未幾遼  
陽平章洪保保及馬彥暉執益殺之其右丞張良佐左

水房高等又執彥翬殺之保保懼走依金山納哈出營  
良佐因為衆所推得權遠東衛事○三月湯和廖永忠  
等克龍伏監擒僉事任文達斬獲千餘人遂會趙庸等  
攻植桑芙蓉洞單屋寨皆平之進克天門山擒張元帥  
及小張僉事又降其衆千餘人至歸州又克李逢春峯  
火山等寨遂進攻瞿塘關時江水猛發即歸州之大溪  
口駐馬候水平進兵先是楊景遣指揮韋權出赤甲山  
以逼夔州指揮李某出白鹽山向舊夔府南岸以攻南  
城寨繼而璟及王簡出溪口進戰瞿塘失利遂及赤甲  
白鹽等兵皆還歸州時諸將伐蜀久未下尋遣朱亮祖  
為征虜右副將統兵往益和等 太祖親祀太歲風雲

雷雨岳鎮海瀆山川城隍旗纛諸神告以用師之意而  
遣之○夏四月傅友德拔文州階州遂趨綿漢先是友  
德既承密諭及至陝遂集諸道兵揚言取金牛潛使人  
覘青川果陽空虛及階文等處守備單弱遂引兵趨陳  
倉選精兵五千為前鋒緣山谷晝夜兼行直抵階州夏  
守將丁世珍來戰敗之擒其將雙刀王等十八人世珍  
遁去遂拔階州進攻文州離城三十里蜀人斷白龍江  
橋以拒我師友德復督衆立橋以濟師至五里關世珍  
復集衆迎戰都督同知汪興祖躍馬直前中飛石死友  
德怒奮兵攻之大破其衆世珍僅以數騎遁去遂拔文  
州以朱顯忠守之進兵渡青州果陽白水江蜀人皆望

風奔潰友德遣人諭各還本業以鞏昌潘指揮鎮守其地即引兵向綿州克之時蜀猶阻漢江之險友德遂令造戰艦百餘艘攻漢州時湯和駐大溪我軍中消息為山川懸阻友德乃以木牌數千大書克階文綿漢日月投江中順流而下達和蜀守將見之多解體○是月友德舟師進逼漢州夏守將向大亨出戰擊破之未幾夏瞿塘守將戴壽聞漢州被兵以鄒興等守瞿塘自抽精兵與太尉吳友仁還援漢州以保成都友德乘壽初還即令軍中曰彼遠來師勞且彼衆聞大亨之敗心尤洵洵可一戰克也親督兵出戰大破壽等遂克漢州擒招討黃龍萬戶梁士達等百餘人壽及大亨奔回成都友

仁亦走古城友德遂以顧時守漢州目將兵擊破古城擒殺二千餘人并擒宣慰胡孔章等獲馬騾五百疋友仁遁還保寧友德欲進兵成都時夏守金州九龍山寨平章俞思忠等率官屬及軍民二千三百餘人來降獻良馬十疋自是聲震成都○先是湯和等以舟師駐大溪口已而友德捷至 太祖恐和逗遛慢事乃引友德冒險克捷之功詔書切責之五月詔至和等即引兵向夔州以規取進時征蜀諸將分兵則勢弱 太祖復勅湖廣平章鄧愈發安陸等衛官軍分遣任亮引兵趨瞿塘以從湯和王成趨興元以就友德仍詔播州楊鑑率馬二千酋兵二萬為友德先鋒○五月己卯廖永忠進

皇明通志卷之三  
兵舊夔州夏守將平章鄒興樞副飛天張來拒敗之明日復戰永忠分軍為前后陣前軍已接乃麾后軍兩翼旁出又大敗之遂擒元帥龔興等殺溺死者甚衆夏人為之奪氣○六月遼東張良佐遣叅政張革行樞密副使焦愚廉訪司僉事李茂及斷事崔忽都等貢馬及以元人所授印金牌大小衙門銅印五十八顆上之并械殺劉益賊平章八丹知院僧兒等送京斬之○是月辛卯永忠兵至瞿塘閬時蜀人以鐵索飛橋橫截閬口水石險阻舟不敢入乃密遣將士數百人舁小舟踰山出閬上流人持糗糧帶水筒以備飢渴蜀山多草木令將士衣青蓑貫魚緣岩而進遂踰關守者不及覺文忠度

夔州

其已至乃以精騎馳出黑葉渡分為兩道乘夜五鼓以一軍攻敵陸寨及黎明蜀人盡出其銳卒迎戰永忠已破陸寨矣既而所遣壯士舁舟出江者從上流揚旗鼓譟而下蜀人震駭我舟帥擁進用火砲火筒火器夾擊之以火液其橫江鐵鎖及三橋俱焚永忠督士力戰大破之鄒興中流矢死擒同僉蔣達等八十人斬首千餘級溺死者無筭飛天張鐵頭張等皆遁去遂入夔州○明日湯和曹良臣亦自歸州白鹽伐木開道出抵方溪會永忠軍遂進兵重慶和統志騎行永忠統舟師乘勝疾趨沿江州縣皆潰乃底重慶次銅鑼峽夏右丞劉仁勸明昇奔成都昇母彭氏泣曰事勢如此縱往成都不可

過延命旦夕何益仁曰然則奈何彭氏曰大軍如蜀勢如破竹城中軍民雖數萬皆膽破心碎豈能效刀驅之拒戰所傷必多不如早降以免生靈于鋒鏑明日遂遣使來納款永忠以湯和未至辭不受越日癸卯和至大會於朝天門外是日明昇面縛啣璧及母彭氏右丞劉仁等奉表詣軍門降和受璧永忠解纜承制慰撫百姓勅軍中不得侵害仍優恤向大亨戴壽等家屬令其子孫持詔書往成都招諭之遣指揮萬德等送昇等官屬并降表至京○秋七月傅友德克成都時友德攻成都守將向大亨戴壽等以象載甲士列陣以禦我師遣先鋒指揮李德英以弓矢火噐衝之象中矢却走壽兵蹂

籍死者甚衆友德亦中流矢未幾湯和遣人以重慶之捷聞會大亨及壽等子弟持諭書亦至壽等無鬪志遂降友德按兵入自東門得士馬三萬遂留兵守之分兵會朱亮祖徇州縣未附者至崇慶知州尹善清拒戰擊斬之判官王桂章出降進克保寧執吳友仁以歸留和陽衛指揮黃榮守保寧全蜀遂定得金寶玉冊銀印五十八銅印六百四卜路府元帥府八宣慰宣撫司二十五州三十七縣六十七將士五萬一千九百九十九人馬騾一萬三千三百八十疋報至 太祖遣李文忠往鎮四川文忠至成都增築舊城置成都府等衛及保寧守禦千戶所以陳聞為成都右衛同知撫輯新附蜀民

賴之○是月置定遼都指揮使司以馬雲葉旺為指揮使先是元大尉開元王納哈出等未附洪保保往逃其營作兵尊會權遼東指揮使事張良佐房嵩等奏言本衛地方遐僻海隅肘腋間皆為敵境今元臣平章高家奴固守遼陽山寨知院哈刺張屯據瀋陽古開元城則有元相不花之兵金山則有大尉納哈出之衆彼此相依互為聲援保保逃匿必有構兵之釁乞留宣詔斷事吳立鎮撫軍民 太祖許之遂以立與良佐嵩俱為指揮僉事仍遣黃儔以書往諭納哈出不服既而本衛又奏納哈出據金山擾邊為患乞益兵為備乃置定遼都衛以雲與旺為都指揮使吳泉馮祥為同知丁德為僉

事總轄遼東諸衛軍事馬雲等由登萊渡海頓兵金州招降元叅政葉廷秀攻走高家奴遂抵遼城繕兵屯田守禦一方云 太祖又慮遼東諸雄窺伺命靖海侯吳禎統舟師數萬往戍之禎由登州取海道運糧至遼東以給軍○八月萬德等以明昇至京廷議受降禮請依宋乾德三年蜀主孟昶降宋故事 太祖曰明昇與孟昶不同昶專治國政所為奢縱昇年幼事由臣下宜免其伏地上表請罪之禮是日乙丑昇率其官屬朝見百官稱賀詔昇歸義侯賜第京師尋徙高麗國○冬十月傅友德廖永忠班師上將軍印綬及獻金印等并籍州縣將士馬騾之數 太祖嘉友德冒越險阻首克階文

歸漢成都等處永忠計破瞿塘重慶致明昇降兩功俱最各賞白金二百五十兩顧時一百五十兩陳德一百兩楊璟王簡無殺伐勞不賞又親制平蜀文以頌傳廖之功未幾元平章僧家奴屯象雲州之牙頭○十二月雲龍夜襲破僧家奴執之盡俘其衆并獲駝馬四百疋遂引兵趨上都克大石岩劉學士等寨及驢兒國公於高州武平虜衆悉遁去復遣指揮孫恭招降故元惠王伯都不花儲王伯顏不花宗王伯帖木兒及大尉蠻子等獲金寶二金印一金字團牌二都不花等至京詔賜第宅及衣服幔帳什物有差

開基卷之三終

開基卷之四

起壬子止癸亥

洪武五年春正月承直郎翰林院侍制王禕及參政吳雲奉詔雲南時天下一統惟元遺孽梁王把匝剌瓦爾密據雲南恃荒遠不臣會禕出使吐蕃還復遣禕等持詔往招諭之或曰禕文臣不可遠陷夷境禕慷慨即日就道及至雲南宣詔且盛述主上德威辭甚嚴厲梁王君臣聽之愕然有降色云○是月廣西右江諸州蠻寇叛命江陰侯吳良為征南將軍帥師討平之○尋出兵沙漠命大將軍徐達總中道兵以湯和等副之出大同趨和林宋國公馮勝為征西將軍以傅友德陳德副之總西道兵出臨洮攻甘肅曹國公李文忠為征虜前將



軍以顧時韓政曹良臣副之總東道兵出北平攻上都  
每路兵十餘萬號四十萬衆先是

太祖以殘虜未除終貽邊憂一日謂廷臣曰今日尚有三  
事未了其一歷代傳國璽在胡未獲其二統兵王保保  
未擒其三前元太子不聞音問至是遣達等分道征之  
仍勅諭諸將察胡情狀審其來否或慎督三軍一鼓可  
俘或堅守斥堠以靜朔方○二月徐達兵入沙漠以糧  
運不敷師疲而還○馮勝等西出破元岐王孛剌力篤  
山斬首數千級遂西取甘州陳德又擒岐王部下將長  
加奴獲畜十餘萬友德由金蘭道率驍將五千趨西涼  
敗元將失刺罕之兵至永昌又敗元將朶兒只巴於虎

刺罕口等獲羊馬駝十餘萬遂進兵肅州射殺元平章  
不花降其太尉瑣納兒等獲馬萬疋直趨瓜沙州擊俞  
寶敗之獲金銀印三馬羊二萬遂取亦集乃路馮勝乃  
分兵守扼塞而還○李文忠由北平踰居庸關直入上  
都擣應昌是月戊申取和林遂陳師于可溫河至哈刺  
莽來虜棄營遁去文忠曰虜褫魄矣可襲而擒但千里  
襲人難多重負乃以韓政駐輜重于驢駒河下令軍中  
人持二十日糧以行至土刺河遇元將哈刺張蠻子悉  
兵渡河列騎迎戰勢甚盛文忠自將一枝兵從上流擊  
之而遣華雲龍督軍從下流以分其勢虜一捷將突入  
我陣文忠射殪之俄而文忠騎馬亦傷流矢下馬短兵

接戰得部下將李榮馬乘之與雲龍兩軍犄角且戰且前虜少却追至河魯渾河虜騎漸衆文忠即歛兵據騁海險立營外示單弱復推牛具食謾為犒大軍者虜疑有伏亦引去文忠留騁海三日始還迷其故道士卒渴死者多文忠患之及至哥兒麻思出野尋水脉忽所乘馬以足跑地水遂湧出及泉三軍賴之文忠曰此天濟我也制文刑牲祭之時顧時曹良臣分兵並進時兵深入迷道且糧盡猝遇胡騎士卒疲不能戰時督其麾下數百人躍馬大呼却胡騎得輜重糧馬以給軍曹良臣孤軍極虜地戰死○夏四月辰靖等州五溪蠻亂復命征南將軍吳良率寶慶衛指揮胡海等討之○五月八

日兵收渠陽之靈溪遂進擊諸蠻一鼓入銅鼓破五開收渾溪再鼓踣騰浪附篤莫越漂洞開太平山之路三鼓服地青城隆徒通洪州良軍令誅止首惡撫其餘黨使仍故業蠻獠尤黠者有曰清洞崖山據銅關鐵寨以抗官軍乃以兵殲之於是古州八萬皆震服收洞寨三百餘所皆編戶附籍蠻獠輸稅奉法一同內地郡境以寧遂刻石紀功而還○六月辰州十八洞及九溪九渡永半坪散毛洞柿溪等蠻復叛復命鄧愈為征南將軍楊璟副之往討遂克四十八洞辰靖攸暨師還賜璟第宅于中立府○七月琉球入貢○十二月翰林侍制王緯奉詔卒于雲南緯被留數月梁王君臣持欲降心至

是適元有遺孽自立于沙漠者遣侍郎脫脫自沙漠來徵糧且欲結梁王以拒我師覘梁王有二心遂出危言以激之使殺禕以固其意禕不屈而死

洪武六年○夏四月大軍出鴈門關西北巡長城外傅友德為先鋒北虜聞之絕塞遁去友德追獲元平章鄧孛羅帖木兒還鎮北平未幾以臨川侯陳德為總兵節制諸軍尋出塞敗虜衆于三岔擒其副樞失刺罕等七十餘人而還駐師陝西又指揮孫恭亦以兵出惠州錦川破松山砦降元侍郎白鴨子○秋七月陳德又擊虜于仄刺河三戰三捷斬首六百級獲僉樞忻都等五十四人○冬十月涼州有虜患命都指揮宋晟討之兵至

亦集乃地斬渠帥也速兒及其部落甚衆復招諭國公吳把都等萬八千人悉降之○李文忠亦將兵屯代縣至於朔州擒元大尉伯顏不花而還

洪武七年春正月李文忠復屯兵代縣遣將分三道以搜虜於時至三不刺者獲元平章陳安禮木屑飛至順寧陽門者斬其將珍珠驢至白登者俘其國公孛羅帖木兒○夏四月改中立府為鳳陽府乃定都南京以應天府直隸六部改浙江等行中書省為承宣布政使司時大寧多殘胡潛伏民間者五月孫恭復率兵往搜捕之遂直抵五鳳山獲元祁太尉及平章賽因帖木兒等○秋七月李文忠出兵大石崖斬故元宗主朶朶失里

及承旨百家奴遂掠豐州擒胡官十二人俘衆一百二十獲馬駝羊以萬計追斬魯王及其司徒荅海俊平章把都知院忽都等又獲其妃蒙哥頽并金印玉圖書各一〇八月安定王遣使來貢

卯  
洪武八年〇冬十二月納哈出寇遼東都指揮使馬雲葉旺等擊走之初雲等聞納哈出欲入寇命蓋州指揮吳立張良佐房嵩等嚴兵以俟且戒之曰虜至勿輕與戰納哈出至見城中備禦甚謹遂越蓋州趨金州城垣未備兵亦寡守將指揮王富韋勝等督衆分門戒嚴選精悍者登城禦之納哈出裨將刺乃吾最驍勇以數騎來城下挑戰城上發弩射中刺乃吾傷悶絕遂執之富

等縱兵出擊納哈出迎戰不利且慮援兵至還兵又懼蓋州襲之乃去蓋州城南十里至柞河遁去先是雲等策其必遁以兵移柞河命張良佐與定遼指揮僉事周鶚自連雲島至窟駝寨十里餘沿河壘水為城以水淋之經宿皆凝隱然如城藏釘板于沙中設陷馬坑于平地仍伏兵待之命老弱捲旗登兩山間戒以聞砲即樹旗無何虜果至雲等俟其過城洵少許即發砲伏兵四起兩山旌旗蔽空鼓聲雷震矢石如雨注納哈出倉卒失措北奔連雲島遇水城馬不能前皆陷入窰中其大潰雲等復自城中領兵追至將軍山栗河大敗之虜傷甚衆遂乘勝直抵猪兒谷獲其士馬無算納哈出僅以

身免

洪武九年○春正月遣使齎勅推馬雲葉旺並龔大都督府事及指揮王富等各陞賞有差○時故元通臣伯顏帖木兒遁住塞境 太祖謂諸將曰延安地遙西北與胡虜接境虜人聚散無常若邊防不飭即入為寇而後防之則塞上之民必然受害○三月命中山侯湯和平川侯傅友德以兵屯延安伯顏帖木兒懼請和

上召諸將還仍勅傅友德屯延安○秋七月伯顏帖木兒果犯邊友德設伏大破之獲士馬輜重無筭已而番酋縛帖木兒以降○八月議征雲南乃遣傅友德巡行西蜀永寧雅播等處修治城郭關梁於是金筑普定中坪

乾溪等寨酋相率來降友德還獻馬五百疋 太祖喜以內院良馬十五疋賞之○冬十二月命衛國公鄧愈為征西將軍都督沐英副之統兵再征西番先是鄧愈從大將軍徐達招諭河州以西悉降未幾吐番所部川藏邀阻烏思藏使者掠其輜重再有是命

洪武十年○夏四月鄧愈沐英等兵至西番分三道併入直搗其巢穴追至崑崙山斬首不可勝計俘男女一萬口獲馬五千牛羊十三萬而還愈卒于壽春○是月置松州衛指揮使司先是松州蠻寇屢敗 太祖以御史大夫丁玉為平羗將軍往平之兩月遂克羗蠻 太祖勅玉相度地宜及防禦長策奏之玉復奏云松州為

西羌諸蠻要地軍衛不可罷詔從其議乃置衛設官領兵戍守

洪武十一年○西番復叛侵我邊郡是年秋八月

太祖親祀岳鎮海瀆鍾山大江旗纛諸神告以出師討罪之意乃命沐英為征西將軍率都督藍玉王勳等往勦之英等統河南陝西山西等處兵首擊朶甘思諸酋遂降其萬戶乞迭迦夷其部落乃進兵洮州時十八族番首三副使汪舒朶兒只頽素子阿烏都兒阿卜商等仍據納鄰七站之地

洪武十二年○正月英等兵至洮州古城遣指揮楊廣千戶李清擊虜遂于東籠山築城屯守未幾虜復戰英

西番

等奮擊敗之三副使遁去遂入其城斬積石州逃叛土官阿昌七站土官朱納等既而三副使復出戰遂生擒之乃遣唐光進攻阿速石門關雪山等寨俱平殺獲數萬人馬二萬牛羊橐駝二十萬納鄰七站等處皆入我職方叶蕃川藏聞之悉降沐英遣使奏捷且請城守

太祖喜曰洮州西番門戶今築城守之是扼其咽喉矣於是置洮州衛命指揮聶偉陳暉楊林孫禎李聚丁能鎮撫其地洮州寧○六月沐英班師以功進英西平侯及藍玉等各為列侯餘將士陞賞有差

曠

洪武十三年○春二月命西平侯沐英統陝西兵征北虜先是元故將脫火赤與知院愛足以兵屯和林出沒

征北

為患至是英統兵狗亦集乃路渡黃河經寧夏越賀蘭山涉流沙至其境去虜營五十里分軍為四路一襲其背二掩其左右英自督驍卒嬰其前鋒俱啣枚以進合圍之脫火赤等懼請降遂獲其全部而還○冬十二月故元平章乃兒不花等復寇邊

西

洪武十四年○春正月命魏國公徐達及諸公侯湯和傅友德耿炳文沐英等出塞討乃兒不花達等兵至北黃河虜遁去友德遂襲破灰山擒平章別里哥樞密副使文通獲其部落人畜甚衆英出古北口畧公主山等寨進克嵩州高州全寧諸部獲知院李宣俘千餘人而還○是月以馮勝佩征虜將軍印節制河南因勅之曰

征北

河南為天下重鎮地廣民稠士馬甚衆方今大將軍征北特命爾節制其地宜休息人民訓練士卒以佐征討時北虜大懲遂不驚邊○夏五月湖南五溪蠻復叛

太祖議將出師時江夏侯周德興年已老請行 上頗難

之德興請益堅且示其夔鑠狀 上壯而遣之賜以手

書擬以充國馬援辭功 ○秋七月兵至五溪蠻威甚盛

諸蠻皆散走遂平之未還復詔德興佩征南將軍印以安慶侯仇成副之往四川討塔平散毛諸洞先是六月

間四川水盡源通塔坪散毛諸洞蠻作亂會德興統兵湖南因有是命是役也 太祖親為文祭太歲諸神而

遣之○秋九月周德興仇成平塔坪等蠻還 太祖嘉

德興老將成功賜勅褒之稱其忠勤不怠禦侮安民仍  
賜田一庄用顯世祿○是時天下大定邊境咸寧四夷  
百蠻稱臣入貢惟雲南恃其險遠殺我信使納我逋逃  
乃是月朔命傅友德為征南將軍永昌侯藍玉西平侯  
沐英副之及列侯吳復金朝興張龍王弼都督張銓等  
統師三十萬徃征之臨發帝躬餞諸將於龍江諭之曰  
雲南僻在遐荒行師之際當知其山川險易以規進取  
朕博覽輿圖次詢有衆得其扼塞取之之計當自永寧  
先遣驍將別出一軍以向烏撒大軍繼自辰沅以入普  
定分據要害乃進兵曲靖曲靖雲南之咽喉彼必併力  
於此以拒我師審察形勢出奇取勝正在於此既下曲

南雲行

靖三將軍以一人提勁兵趨烏撒應援永寧之師大軍  
直擣雲南彼此牽制彼弊於奔命破之必矣雲南既克  
宜分兵徑取大理先聲既振勢將瓦解其餘部落且遣  
人招諭不必苦煩也諸將謹受命時仇成還軍至常德  
遂命從友德征雲南○友德兵至湖廣涉雲南界即遣  
都督陳桓胡海郭英等以兵五萬循永寧趨烏撒時諸  
將欲深入郭英曰破敵貴先聲攻取自近始舍近而趨  
遠非策之上也會虜右丞實卜營於赤水河以拒我師  
英亦去河二十里營之值暴雨河漲英曰賊恃水不度  
度吾之遽濟也可襲之遂下令中軍斫木造筏夜半渡  
河比曉敵始覺大驚潰遂擒烏撒并阿容諸蠻由是遠



近聞之膽寒○時福建漳州南靖及廣東潮州海陽等處復叛冬十月命南雄侯趙庸調兵討之庸以兵殲閩中諸盜遂趨廣東擒賊十餘并其家屬二千七十餘人又進兵程鄉擒萬戶饒隆海等百五十人斬首四十級遂悉平之○十一月友德等大軍由沅辰趨貴州遂攻普定擒土酋安瓚羅鬼苗蠻犵狁等○十二月下普安留兵戍守仍循格孤山之南以奇兵襲畢節可渡河皆下之遂進攻曲靖時故元梁王把匝剌瓦爾遣司徒平章達里麻統精兵十餘萬來戰沐英曰敵度我疲于深入未有虞心及其無虞心乃可破也遂兼程而進未抵白石江忽大霧四塞衝霧阻水而營及霽達里麻隔江

望之大驚以為神兵飛至達里麻即整兵陳於水上友德欲濟英又言曰未可當別遣一軍泝流潛渡出其陣后鳴銅角樹旗幟作兵出山谷間狀以疑之友德聽之達里麻果驚輒徹兵反禦陣少亂友德等亟引兵渡江先以猛而善泅者長刀蒙盾研其軍而奪之氣敵却數里而后敢陣於是我師盡渡友德列陣督戰矢石如雨聲震天地戰數十合興武指揮趙旺遇坎馬蹶賊鑽槊刺之而死英等力戰縱鐵騎衝其中堅斬數百人敵大敗擒達里麻俘甲士二萬馬萬疋死者橫尸十餘里友德盡釋所俘遣歸業虜情帖然願服曲靖平留兵鎮之郭英又擊越州龍海諸寨及六梁州遂擒帖木兒王子

兄弟乃轉向永寧友德自帥師循格孤山之南以向烏撒遣沐英藍玉以兵趨雲南時梁王既得達里麻敗報震怖即携妃遁池島中赴水死是月二十四日也英等兵次于板橋故元右丞觀音保舉城降父老爭出金馬山焚香以迎王師遂克雲南兵入市肆如常兒童不驚得梁王金印及官府符信圖籍等遂撫綏軍民雲南平沐英遂以兵直趨烏撒會友德大軍友德遂循格孤山南又會郭英等永寧之師先是元右丞實卜復聚兵赤水河及聞友德沐英兵交至實卜懼即遁去友德令軍士築城為守計版畚方具虜乘隙來攻我部下欲戰友德堅壁不許既而士卒思奮願效一戰友德度其可用

南雲

撒烏取

下令曰我師深入有進無退彼既遁而復合心必不一并力與戰破之必矣若使彼據險自固未易克也遂進兵會敵有芒部土酋率衆來援實卜實卜因與合衆戰數十其酋長多中槊隊馬死蠻衆遂潰斬首三千級獲馬六百疋實卜遁去遂城烏撒得七星關以通畢節及可渡河於是東川烏蒙芒部諸蠻震懼皆望風來降又以兵畧元司省各路官張麟等降之得金銀銅印七十匹馬數萬疋

戊午

洪武十五年○春正月始置雲南布政司及府州縣等先是太祖遣勅諭傅友德曰雲南既克然區畫布置尚煩計慮前已置貴州都指揮使司第去雲南尚遠今

必置都司于雲南以統率諸軍既有土有民又必置布政使司及府州縣以治之其烏撒烏蒙東昌芒部建昌之地更宜約束其酋長留兵守禦禁民毋挾兵刃至如靄翠輩不盡服之雖有雲南亦難守也故有是制○是月沐英徇建昌澂江臨安尋甸楚雄洱海等處皆下之降其平章闡乃馬參政劉車兒不花遂向大理○二月傅友德以故元威順王之子伯伯梁王家屬三千一百一十八人遣指揮何福送入京并以便益請 太祖即以勅遣福還諭友德勅云今諸州已定惟大理未服即當進討若頓兵宿旅非我之利要在乘機進取一舉而定故命福馳還諭將軍夷性頑嚚多詐攻戰之策必籌

大理

之孰矣所奏事宜悉從爾請福尚未至乃閏二月克大理時大理恃點蒼山西洱海為固南詔皮羅閣所築龍首龍尾二關最險土酋段世聚眾五萬振關以抗王師英自將攻之不拔乃令王弼以一兵由洱水東趨其上關英自以一兵趨下關聲勢互為應援別以一軍遣胡海從間道繞出點蒼山之後攀木緣崖而登立我旗幟我軍望見踴躍震呼賊眾驚潰英遂策馬渡河諸軍從之斬關而入王弼兵亦未應賊腹背受敵遂克大理擒段世及脅從者不問夷情大悅遂分兵取鶴慶平麗江破石門下金齒由是車里及摩步和泥車里平緬等部相率來歸遂取建昌獲元平章月魯帖木兒雲南悉平

○夏四月烏撒東川建昌芒部等又叛。上遣使勅友  
黨白諸蠻伺官軍散處大勢不合故有此變。今宜屯聚  
大軍蕩滌諸部蠻寇。戮其酋長使之畏服。方可分兵守  
禦。七月勅至。遂檄英會兵討烏撒東川建昌等部。大破  
之。斬首三萬級。獲馬牛羊數萬。會烏撒西堡蠻賊一萬  
五千餘人入寇。普定友德復遣指揮顧成擊之。賊皆遁  
去。邊破大渡河守禦千戶所調千戶吳忠領兵守之。乃  
以烏撒烏蒙芒部三郡地近四川。奏隸四川布政司。餘  
列爲府州縣。及宣慰長官司。共一百有八。籍其戶凡七  
萬四千有六百。設官甸民置衛守禦。俱隸雲南布政司。  
大軍復東。四出取諸蠻之不服者。時雲南城守兵少。諸

蠻夷聞之。因相煽爲叛。謀有土官楊直充桀黠。給其下  
曰。總兵官已領大軍回矣。雲南城可圖也。糾集蠻衆二  
十萬。薄城下。守將都督謝熊都指揮馮成督衆嬰城固  
守。以強弩於陴上射賊。多中斃者。賊不能攻。遂爲困城。  
計時沐英駐兵烏撒。報至。即統驍騎萬餘赴援。至曲靖  
先遣一健卒潛入報城中。爲賊所得。卒給之曰。總兵官  
領軍三十萬至矣。賊駭愕。即拔營遁走。安寧晉寧江州  
等處復據險立寨。欲謀再舉。英調兵殲之。斬首六萬餘  
級。俘四千餘人。諸郡悉定。雲南復平。繼而傅友德等平  
蒙化府鄧川州。破佛光砦。過金沙。攻地勝府。擒平章  
高生。復平麗江府平津等州。前後斬首一萬三千級。蠻

民降者數十萬戶

洪武十六年○春正月

太祖遣長興侯耿炳文諭友德班師以沐英鎮雲南先是友德遣人送雲南右丞觀音保參將劉車兒不花及段世等一百六十人至京乃有是諭且曰遲速之機宜自審度友德奉諭遂還軍英鎮雲南時自麓川有緬車壘有八里媳婦皆附焉是歲也東起朝鮮西至嘉峪南濱于海北連沙漠經緯道路各萬餘里大明一統之盛蓋雖有殘虜如納哈出輩為擾然已遠遁塞外無足為中原慮者况歸命亦在旦夕也嘗恭閱我

太祖之造天下勞苦之迹惟陳寇耳若庚子癸卯二大戰

皆酷暑臨陣冒險督兵克夷大敵其他則惟任將得人指授方畧瘁心殫思幾三十年而天下定夫既知其所以創則以此而思其所以守既知其創之所以艱則以此而勵其守之所以不易昔周臣之言曰欲至于萬年惟王子子孫孫永祿民夫古之稱善祝者莫過周之臣也而惟此欽我 國家

聖子神孫體

太祖之初心守

太祖之成法以致盛治以隆億萬年無疆之令緒其在茲手

開基卷之四終

皇明泳化類編靖難之卷

成祖靖難之跡

鄭端簡公曉云余好問先達建文時事嘗為余言建文君寬仁慈厚少好文章禮樂不喜任律法操切人比即位得方孝孺專意行周官法輒改高皇帝約束靖難兵起不為覺即有敗狀來聞亦輒謂直君獲兵盪平在旬朔間耳諸大將統重兵北進者又多懷勢貳心以故成祖至江上不戰而潰余至建業聞之江上老人曰成祖乃天授建文君何尤

靖難卷之五

成祖初封為燕王

成祖之生也天表秀麗解兵法能善

太平天子

戰一日同建文君侍 太祖偶觀殿前仗馬作句云風  
吹馬尾千條綠建文君對兩灑羊毛一片氈 太祖愀  
然俄而 成祖應聲曰日照龍鱗萬點金 上大悅先  
是洪武壬戌 上以習素燕周等國為西北重藩須其  
人以導之乃詔高僧四一人令輔諸王善時吳下有異  
僧名道衍 因宗泐薦被選燕府王與語當意道  
衍亦識之遂進曰殿下將無作皇帝乎密有推戴王王  
每見道衍輒叱和尚勿謬說道衍思以計等力王遂薦  
寧波一相衍曰袁珙者于王王召珙珙一見决大平天  
子且曰他日龍蟠及濟當陟寶位自是王意决矣會建  
都金陵去邊塞遠常報北虜入寇 太祖命習素燕周

戊寅

並鎮邊國擁三護衛重兵仍命諸王得專制訓練以故  
燕王聚有精兵可用云

洪武三十一年閏五月皇太孫即位詔明年為建文元  
年時兵部尚書齊泰受顧命王子澄以舊學官權太常  
卿召方孝孺為侍讀擢練子寧為副都御史並見信用  
諸王皆親叔尊據要地專兵權建文患之謀及子澄等  
泰與子澄首請倣漢削七國故事建文以為然未幾澄  
遂與齊泰講之泰曰燕握重兵且素有大志當先削之  
子澄曰不可燕預備久卒難圖宜先取周以剪燕之手  
足則燕可圖矣遂請于上命曹國公李景隆即訊周王  
逮至京廢為庶人燕王益懼陰簡壯士積府中日夜思

舉事屢召道衍問期道衍每對未可令擇日則曰必須  
某月某日某時云○是年四川岳池縣教諭程濟奏云  
熒惑守心應明年兵起北方建文怒其妄言逮至京繫  
獄○未幾有告燕齊變者建文以問黃子澄輩曰當孰  
先發子澄對曰燕王久稱病而日操練兵馬此其機以  
露討之不可不亟復召齊泰諭以燕王素善用兵計將  
安出齊泰曰近日邊報北虜聲息今但以防邊為名發  
兵戍開平其燕府護衛精銳悉調出塞是去其羽翼無  
能為矣不乘此時圖之噬臍無益也建文然之○冬十  
一月以工部右侍郎張昺為北平左布政使謝貴為都  
指揮使俾觀燕府動靜圖之時魏國公徐輝祖為燕至

親燕妃輝祖妹也輝祖每見上密告燕情上信任之詔  
加太子太傅與李景隆同掌六軍事協謀圖燕時望氣  
者皆謂燕地有天子氣云

洪武三十二年春正月燕府長史葛誠自金陵還初誠  
受燕王命奏事來京其實覘之也及誠至京上召問燕  
府事誠不為隱上遂托誠使為內應誠諾之至是還燕  
王察誠有變狀遂深疑之時燕王招至四方異人術士  
相咨災祥○二月朝廷以都督耿璽掌北平都司都御  
史景清署北平布政司叅議皆使覘燕邸事密聞于朝  
請為之備一日燕王享耿璽景清及宋忠張昺謝貴等  
命相者袁忠徹行酒陰相之酒罷忠徹告王曰諸臣皆



福薄不能成功燕王喜忠徹表瑛之子是月王入朝行  
皇道入登陛下拜御史曾鳳韶劾王不敬戶部侍郎卓  
敬上書論劾皆不報○三月朝廷用齊黃策命都督宋  
忠統沿邊各衛馬步官軍三萬屯開平調燕府精兵俱  
隸忠麾下又召燕府胡騎指揮閔童等還京命都督徐  
凱練兵于臨清都督耿璈練兵于山海關名備胡勅乘  
曷謝貴常密伺約期而發是月成祖還國俄北平按察  
使事湯宗上變告言按察使陳瑛密受燕府金錢有異  
謀遠瑛安置廣西○夏四月 太祖小祥燕王遣世子  
及諸子高煦高燧三人入臨或謂不宜偕往成祖曰使  
朝廷勿疑也及至齊奏議請先收之黃子澄以不可恐

彼藉口得為先備莫若遣歸以怠之燕世子三人皆徐  
輝祖甥輝祖察高煦狀異常欲帝留之密奏曰臣觀三  
甥中獨高煦勇悍無賴自倚騎射非惟不忠抑且叛父  
他日必為大患會都督徐增壽附馬王寧力救且保其  
無他建文君遂遣還三子盡得京師動靜而歸燕王悅  
曰吾父子復相聚此天贊我也大事濟矣後靖難兵起  
高煦宣力居多建文始大悔是時周王民齊王廢相王  
自焚死未幾幽代王挂下大同繫岷王梗于雲南並庶  
人成祖威名日盛又於諸王中最長地勢形便兵力又  
最強朝廷深疑之齊泰黃子澄徐輝祖卓敬等日夜謀  
所以防燕者會燕長史葛誠教授余逢辰亦稍洩其謀

朝廷諸大臣協畫兵情震于燕府北平右布政使曹昱副使張璉皆以交燕府被逮燕王兩奏疏以保全骨肉為題懇懇千餘言不報詳前○六月燕山左護衛百戶倪諒上變事告燕邸官校于諒周鐸等陰謀逮京誅之仍詔書讓王王稱疾遂狎狂走呼市中奪酒食無復王者儀或卧土壤彌日不甦宮中亦杖而行張昂等入問疾獨芻誠私于昂曰非疾也不得于上故耳建文聞之益忌燕遣諸將分兵屯近地日見逼脅會燕山護衛百戶鄧庸奏事至京下獄訊之庸具燕王將發兵狀齊泰等即發符遣使收燕府官屬密令謝貴張昂舉事及燕府長史葛誠護衛指揮盧振為內應以討燕初燕王以

信學王

北平都指揮使張信為腹心朝廷密勅信擒王信受命懷難日夜憂毋疑而詰之信以實告毋驚曰不可吾聞燕王當有天下王者不死非汝所能擒也汝未聞爾父之言乎信父常言王氣在燕分信益有憂不知所出未幾朝廷復勅趣信信艱然曰何其甚至此也往啓見王王不可信乃乘婦人輿徑詣王府求見王見其輕身無他召至床前比至王陽為感風不能言信曰殿下無然有事當以告臣王曰誠有疾非詐也信曰殿下不以誠語臣今朝廷勅信擒王王果無意乎當就執如有意當以告臣王感其誠遂起而拜曰生我一家性命者子也呼為恩張是日遂召道衍等同信議事適有簪瓦飄墜

地而碎王色變以爲不祥道衍曰此祥也王謾罵曰汝何妄言此烏得爲祥道衍笑曰天意欲殿下易黃瓦耳王大喜謀遂定初建文君勅張昺等譏燕府事密聞及是昺等急遣人奏之已得旨逮燕府侍衛官未發先是布政司吏李友直有智計而譎昺寄以腹心察府中友直反泄昺謀至是乃竊奏章以獻燕王王出以示護衛指揮張玉朱能曰此何爲者邪遂令玉等帥護衛指揮八百人入衛○七月中使奉勅至貴昺等遂以北平城中七衛并屯田軍士布置街巷薄燕府又設木柵於端禮等四門以礙之軍士躬擐甲胃鼓震城中索所逮飛矢如燕府王召玉等謀曰彼軍衆盛吾兵少恐不足解

事柰何玉等對曰先擒謝貴張昺餘無能矣王曰貴等防守旣嚴猝亦難擒以計取之可也今奸臣遣內官某來逮護衛官屬悉所坐名收之就令差來內官召貴昺付所逮則貴昺必來來即縛之一夫之力耳玉曰謀是月初四日壬申王稱疾愈御東殿官僚入賀燕王先令伏壯士於左右及端禮門內遂假內官召二人付所逮時二人衛士甚衆至門門者呵止之惟貴昺得入及端禮門壯士出執先是王扶雙杖坐殿上命官屬入賜宴行酒進瓜及貴昺二人及前王擲瓜罵曰吾奉藩守土未嘗干擾有司爾等爲何離間吾今何病第爾輩奸臣所迫耳王下御座兩廡伏兵皆起遂執長史葛誠指揮

盧震并貴昺皆斬之諸將士圍燕府者聞貴昺死遂潰  
燕王乃命張玉等督諸將乘夜攻奪九門黎明已克其  
八都指揮使俞瑱出走居庸關惟西直門未下燕王命  
指揮唐雲單騎往諭門者曰汝毋自苦今朝廷已聽吾  
王自制一方衆遂降王乃布令安集城中軍民等人心  
稍定遂作諭書播於衆曰予太祖高皇帝之子今為  
奸害祖訓云朝無正臣內有奸惡必訓兵誅之以清君  
側之惡今禍迫于躬不得已也義與奸邪不共戴天率  
爾將士誅之用命者有厚賞不用命者必顯戮罪人既  
得則法周公以輔成王爾等是体予心毋違是月癸酉  
燕兵起名其師辭以誅奸臣齊泰黃子澄等時浙江鄞

縣人金忠精於卜王召忠卜云大吉乃署為本府紀善  
日侍幃幄資謀議云王師既動三司官不同心者誅之  
時布政司叅政郭資按察司副使墨麟都指揮同知李  
濬陳恭等皆順之凡三日北平城中諸將士皆定遂出  
師命世子君守除建文紀年仍稱洪武別置官屬以立  
福張玉朱能為都指揮僉事擢李友直為布政司叅議  
接倪文僖公集載交直當成祖即位擢冬亞卿深被寵  
眷遷大司空正統戊午卒于位英宗錄其功遣祭壘  
陰其子孟陽為工部員外郎主事轉都水郎中時文僖  
為作陞秩序文極稱其器識帝達且云不惟此生奇才  
以馬朝景運於前必篤生賢子孫以承緒於後也以郭資留輔守北平明日兵  
次通州降其指揮房勝進克薊州都指揮馬宣死之張  
玉撫集薊州人民乘夜襲導化王戎將士曰行師以綏

定百姓爲務貪殺者必誅是夜四鼓抵遵化指揮將王  
降入城惟擒斬其死拒者餘不戮一人遂徇永平府守  
臣指揮陳旭趙彞郭亮等以城降燕王遣將徐忠分兵  
進克灤河時朝廷以宋忠爲懷來都督俞瑱居庸都指  
揮使兩地犬牙互爲聲援協力謀北平城未及舉而泄  
燕王與諸將議曰居庸關路隘而險北平之襟喉也百  
人守之萬夫莫窺必據此乃可無北顧之憂今聞瑱不  
度力城守欲來攻我北平乘其新集衆心洶然我以兵  
突然臨之即成擒矣不爾必爲所增兵壯關將焉用之  
諸將曰善乃遣指揮徐安等督兵速往居庸時瑱部伍  
未定安令前鋒徐祥領騎兵擊關破之大呼殺入城瑢

軍大潰走依宋忠燕王謂諸將曰宋忠擁兵懷來視居  
庸爲必爭之地欲乘其未至可先擊之諸將謂彼衆我  
寡難與爭鋒宜固守居庸以待其至燕王曰不然兵貴  
以智勝難以力角彼衆新附其心不一且宋忠輕躁寡  
謀狼狽自用我乘勝而往必能繼捷遂即馬步精銳八  
千人捲甲倍道而進先是燕王得謀者言宋忠誑其部  
下將士云爾父兄弟在北平者盡爲燕王所殺以怒  
諸士卒而厲其戰部下聞之疑信者半燕王乃選其親  
屬各張其舊用旗幟爲先鋒忠軍中遙識其旗幟又識  
其父兄弟無恙皆喜曰我家固生全矣遂多降者忠  
氣沮王麾兵渡河鼓噪直衝其陣忠帥衆來戰未及陣

來懷克

燕王分兵擊敗之患急走入城燕兵追及之忠匿廁中  
燕兵蒐獲并填擒之走賊聽斬其指揮彭聚孫泰于陣  
都指揮花得敗走獲馬八千餘匹餘衆悉降懷來居庸  
既後遂震于山後諸州備平龍門上谷雲中等處諸將  
向風來附時谷王穗國于宣府聞之大懼乃率其妃妾  
遁歸京報至朝廷倚黃子澄齊泰遂命長興侯耿炳文  
爲征虜大將軍佩將軍印帥師三十萬北伐建文君方  
銳意文治日居便殿惟召學士方孝孺等討論周官法  
度以爲北兵不足憂黃子澄謂北兵素強且兼有營剗  
之旅不早禦之恐失河北又請命安陸侯吳傑江陰侯  
吳高都督盛庸都指揮楊松顧成徐凱李文陳暉平安

等各帥偏師騎步號百萬數道並進期搗北平○八月

己酉耿炳文師次平燕布政司

即真定府時建文所改也

燕兵南徇

炳文乃分遣先鋒將都指揮楊松領驍勇九千人屯雄

縣都督徐凱駐河澗潘忠向莫州以撓之張玉進于燕

王曰楊松潘忠各擁兵以扼吾南路宜先取之燕王從

之以玉爲先鋒朱能爲副親督諸將至涿州遂下之是

月壬子屯婁桑燕王令軍士秣馬奪食晡時渡白溝河

謂諸將曰今夜中秋彼必飲宴不虞吾突至此可破也

亟行夜半至雄縣圍其城先是楊松領兵守雄仍約忠

爲殿至是燕兵攻之急忠援不及越黎明遂破松戰死

麾下士盡潰獲馬八千餘匹燕王度忠但聞吾之圍城

不虞吾之破城必自莫州來援遂以兵進莫州乃謂其  
下曰今夜半吾必生擒忠諸將未喻王乃遣譚淵領兵  
千餘人度月榘橋伏水中各取芟草蒙其頭又令數十  
人匿路傍相約曰望我兵遇忠等接戰即舉砲伏起既  
而忠等兵果至燕王進兵迎擊之路傍砲舉水中伏亦  
起據橋忠敗急趨橋不得燕兵腹背夾擊遂擒忠餘衆  
多溺死至鄭州降其衆萬餘又獲馬九千餘疋先是張  
玉往真定覘炳文營還報燕王曰炳文軍無紀律無能  
爲也及定莫州王問諸將師所向玉對曰當徑趨真定  
彼衆新集勢未齊一我軍乘勝可一鼓破之王曰玉意  
正合吾意吾倚玉一人足辦矣王督兵由間道進次無

極縣去真定二十里營之因炳文部將張保來降且言  
炳文兵三十萬先至者十三萬分營滹沱河南北玉厚  
撫保遣歸詐言兵敗被執幸守者困得脫竊馬歸又令  
言雄鄭敗狀燕兵旦夕且至宜令河南兵北移得併力  
破之易炳文聞保言果移南營過河自是東南無備惟  
河北由西門直抵西山而營是月癸亥燕王及丘福以  
兵出其背炳文等出戰未能帥敢死士三十餘騎衝其  
陣諸軍夾擊之遂橫透其陣炳文戰敗急奔入城燕兵  
追之遂擒右副將軍都督審忠已而燕騎士薛祿又獲  
左副將軍駙馬都尉李堅都督顧成遂降燕安陸侯吳  
傑兵亦潰傑遁還京謫南寧衛指揮是戰也炳文士卒

死者三萬餘人燕王勞玉曰今日之捷汝之功也非汝與吾意合不及此時朱能又統騎卒轉至渾沱河炳文衆尚數萬復列陳向能奮勇大呼衝入其陣衆披靡自相蹂躪溺死者又無算燕王以書褒能仍授薛祿護衛指揮僉事繼而燕王仍以兵圍真定二日不下遂還北平炳文敗報至建文君始大懼召群臣問計黃子澄對曰勝負兵家之常無足慮者今天下全盛士馬精強兵甲堅利糧餉充足取之不竭用之有餘區區一隅之地豈足勝天下之力調兵五十萬四面攻之衆寡不敵必成擒矣上曰誰可將子澄曰曹國公李景隆文武才也向若不遣長興侯而用曹國公必無此事上然之遂

拜景隆征虜大將軍統兵北伐召炳文還及景隆行上親餞之江滸授以斧鉞俾承制不用命者戮之又賜通天犀帶一圍以都督府斷事高巍贊軍務○九月遼東守將江陰侯吳高都指揮耿獻揚文等聞燕師駐真定悉兵攻永平永平告急時李景隆帥師至德州收炳文殘衆并調各路兵軍馬號五十萬進營河間山東叅政鐵鉉調糧餉謀攻北平燕王與諸將議曰北平兵食足世子能得將士心可備禦無患永平失則東藩撤矣當馳援永平既而景隆亦顧望住師河間不進燕王聞之呼景隆小字曰李九江膏梁豎子耳而輒以五十萬衆付之敵詳將是自坑之也趙括復見於今矣然吾在此必

二月永平有公篇  
青桂失三五



不敢至今聞吾往援永平彼乘我出必來擣虛回師擊  
之所謂致人而不致于人者也或謂北平兵少王曰不  
然城中之兵以戰則不足以守則有餘若吾堅壁不出  
抵自示弱耳且使彼得專攻今兵一出是奇變隨用內  
外掎角策之善也吳高素怯不能戰聞我至必走是我  
一舉解永平圍直誘九江來就擒耳遂行諭世子嚴守  
勿輕出戰時諸將請守盧溝橋王曰李九江方圖深入  
今我舍此不守使彼肆志將守困於堅城之下利而誘  
之亦兵法也明日燕兵趨永平吳高聞之果引師遁還  
山海關燕兵追擊之斬首數千級○冬十月遂議攻大  
寧鎮時大寧寧王國馬 太祖諸子中成祖善戰寧王

善謀初成祖奉命巡邊至大寧因結寧王相得甚歡后  
建文君用齊黃計誣諸藩諸藩因有異謀二王遂密約  
事成中分天下及是朝廷詔削大寧三護衛成祖聞之  
喜曰此天贊我也取大寧必矣乃陽爲不知詔削事以  
書貽寧王求爲和解寧王得書大喜報之成祖議遂決  
其部下將又有謂向大寧必道松亭關松亭險又劉貞  
徐亨等堅守猝恐難破莫若且回師破景隆徐取大寧  
其計萬全王曰北平深溝高壘守備完固縱百萬之衆  
未易以窺也大寧兵悉聚松亭關其家屬在大寧城中  
今從劉家口間道徑破大寧仍撫其將士家屬之在城  
者則松亭關之兵不降即潰第從子行無憂也時大寧

諸守將惟指揮卜萬有智勇且忠朝廷王知之行反間  
激劉貞囚卜萬于獄以此大寧士伍無列燕遂襲破其  
城都指揮朱鑑及卜萬皆戰死都督陳文都指揮房寬  
指揮徐理陳文景福千戶朱榮等皆驍將也悉降之劉  
貞單騎負勅印走遼東浮海還京松亭關師遂潰燕兵  
以寧王還北平兀良哈三衛胡騎及護衛官校戍卒等  
皆從以行大寧城空燕自此兵勢益盛先是景隆既聞  
燕兵出大寧遂以師渡蘆溝橋喜曰不守此橋吾知其  
無能為矣遂薄北平城下築壘九門景隆攻麗正門幾  
破城中婦女並乘城擲瓦石景隆軍令不嚴驟退北平  
守益堅景隆遣別將攻通州敗績又結九營於鄭壩村

親督以俟燕兵還又遣兵攻燒順成門燕府儀兵李讓  
與其將梁銘等力拒世子嚴肅部署每乘夜令驍卒緹  
城砍其門南軍時驚擾乃退營十里時景隆軍中令壘  
營入合為戰非受命不得輕動惟都督瞿能勇奮督其  
二子帥精騎千餘人張掖門甚銳顧後軍不至乃勒兵  
以待景隆忌沮之不令速進以故北平城中得為備連  
夜汲水灌城城水不可攻繼而王還兵會州遂簡閱將  
士分署為五軍命都指揮張玉將中軍朱能將左軍李  
彬將右軍徐忠將前軍房寬將後軍軍各置左右副將  
悉大寧諸衛及降胡奚勒丹兵分隸各軍十一月庚午  
燕還兵鄭村壩景隆遣都督陳睥領哨騎渡白河迎戰

燕將薛祿等禦之暉敗僅以身免先是景隆立九營令其下合戰及是燕王悉精銳攻一營殲之莫有救者遂連破其七營進逼景隆營景隆莫能支宵遁然九壘尚未之覺也明日張玉等列陣而進直抵城下城中亦鼓噪出中外夾攻次第破其四壘南軍始聞景隆走亦南潰景隆還德州癸酉九門兵皆潰諸將入賀因服王妙算如神王曰偶然諸君所言乃勝算也我因度有可乘之機故未暇用此不可爲常後有成議毋諱初景隆爲黃子澄所薦景隆敗子澄匿不以聞一日建文帝問子澄曰外間近傳軍中不利何如子澄對曰聞交戰數勝但天寒士卒不堪今暫回德州待來春更謀進討景隆

遂以視退燕師聞建文帝喜加景隆太子太師仍遣使齎豹裘文帛白金珍醞賜之時成祖乃奏于朝罪狀左班文臣齊奏黃子澄等奸惡且曰乞將奸臣發來軍前究問如陛下不發臣必不休兵抵京師赤地千里○是月罷兵部尚書齊泰太常寺卿黃子澄然名雖罷而籌畫治兵如故繼而成祖聞景隆治兵德州期明春大舉乃召諸將諭之曰聞九江舉在明春我當誘之來以敵其衆今進兵大同大同告急景隆勢必赴援苦寒之地南卒脆弱不堪旣疲奔命因以凍餒逃散必衆兵法所謂逸而勞之安而動之不戰而屈人之兵者也諸將曰善○十二月燕兵出紫荆關遂趨大同

洪武三十三年春正月燕兵圍蔚州指揮王忠李遠以城降遂進攻大同守將告急李景隆果引兵出紫荆關援之燕兵遂由居庸關還北平景隆麾下凍餒死者甚眾鎧仗委路不可勝計景隆上書於燕請息兵王答書索齊秦黃子澄等○四月朔李景隆大會諸將于德州遣武定侯郭英安陸侯吳傑等進兵真定以圖燕時建文君委景隆甚重賜之斧鉞旌旄得專生殺景隆益驕恣觀望不即盡力又紀律不嚴號令煩數諸將易玩朝臣尋策其必敗而帝不悟是月景隆帥師自德州北伐朝廷又遣徐輝祖帥京軍三萬為殿輝祖星馳往會時景隆軍過河間府前鋒已抵白溝河郭英等各領兵道保

定來會合軍六十萬號百萬列陣以待燕王以兵駐固安謂丘福等曰李九江等數子無能為也惟恃其眾耳人眾易亂又曰將者三軍之司命也將志衰則三軍之氣不奮敗之形也爾等但秣馬厲兵聽吾指揮舉之如拾芥兵法云敵雖眾可使無閔又識眾寡之用者勝吾策之審矣第過殺當戒耳是日燕軍渡王馬河駐蘇家橋營焉己未景隆及英傑等兵會于白溝河勢甚盛燕王自帥兵以朱能為先鋒日中亦至白溝迎戰南將都督平安瞿能奮勇先登王曰平安豎子往從吾出塞識吾用兵以故敢為先鋒今日吾且破之安驍勇善戰互有勝負燕兵被殺傷頗多燕內官狗兒者亦驍健同千

戶華聚等自河北岸力戰燕王又躬督數萬兵夾擊亦破南兵殺傷數千人執其指揮何清時已暝兩軍相持戰至夜深乃各還營是夜燕王從三騎殿後迷失道下馬伏地視河流辨東西始知營在上流倉卒渡河而北明日庚申以張玉將中軍朱能將左軍陳亨將右軍爲先鋒江福將騎兵繼之馬步共十餘萬早渡河索戰瞿能及其子先與燕將房寬接戰平安帥大軍爲兩翼應之大敗房寬擒斬數百人張玉等色懼王厲聲曰勝負常事耳彼兵雖衆不過日中保爲破之即躬督精銳數千人突入其左掖高煦率張玉等軍齊進王先以騎馳擊之且進且退如有餘各殺傷亦尋南軍飛矢如注

白溝之戰

王馬三易三被創所射矢三服皆盡乃提劍奮擊劍鋒折不可用走登隄馬阻于隄幾爲瞿能所及王佯麾鞭若招後繼者景隆等疑有伏遂止王復率衆馳入陣平安善運槊所向無禦遂斬北平將陳亨於陣徐忠亦被創兩指斬未殊忠自斷而擲之裂衣褻瘡力戰高煦見事急帥精騎數千前與成祖合時已薄午瞿能復引衆躍而前大呼殺入斬其騎百餘人時越嵩侯俞通源陸涼衛指揮滕聚等復引衆合圍王戰力亦窘得高煦兵乃振會大風起南師陣少動王即以勁騎繞出其後突入與高煦兵奮擊之遂斬能父子於陣平安亦被朱能擊敗南軍遂潰俞通源陸聚等皆戰死北兵乘勝追

至營乘風縱火燔之監軍侍郎陳復初朝服躍馬弱河而死郭英等潰而西李景隆潰而南器械輜重積路斬首及溺死者十餘萬張玉又帥師追殺至月樣橋等處橫屍百餘里景隆單騎走德州其後白溝果骨如莽過者慘目降衆萬餘入燕王悉慰遣之獨魏國公徐輝祖帥師爲殿全軍還成祖遂畧德州○五月山東叅政錢鉉方督餉赴景隆軍中會景隆帥潰東奔諸城邑皆望風無固志時方端午鉉與叅軍高巍酌酒爲盟慷慨涕泣以死相矢遂趨濟南收殘衆召募士卒守之景隆聞北兵至又棄德州走濟南依鉉等燕兵遂入德州撫吏民籍府庫獲糧百餘萬解軍餉大饒屬邑皆下燕哨騎

至濟陽縣教諭王省死馬詳忠烈是月庚辰燕兵追景隆衆尚十餘萬倉惶出戰未及布陣王帥精騎馳擊之景隆復大敗單騎又南走燕兵圍濟南鉉等督衆力守燕兵不能下未幾朝廷召景隆還又以左都督盛庸爲征虜大將軍右都督陳睥副之統兵北征景隆還上曲赦不誅黃子澄慟哭曰景隆出師觀望懷二心不亟誅何以謝宗社厲將士不聽副都御史練子寧亦憤激執景隆於朝班且哭且數其罪頓首曰敗陛下大事者此賊也臣備員執法不能除奸請先伏誅不聽帝之仁柔如此燕師圍濟南日久令人射書城中促降時有儒士高賢寧乃自城中作周公輔成王論射城外請罷兵

不報其後城拔得賢寧 成祖欲官之賢寧不受遂遣之以全其所志云當燕兵欲塞水以灌濟南城中大懼鉉曰無恐計且破之不三日遁矣令登陴人皆哭呼曰旦日且降盡輟守具出千人城外伏地請降又請退兵十里無驚動城中人大喜時燕用兵逾年僅得永平保定北平三府諸府縣旋破旋堅守不肯降及是取濟南降喜曰濟南中原要會得濟南斷北即不下金陵畫中原自守徐畧江淮遂下令退軍受降軍中大喜呼萬歲鉉爲謀懸鐵板城門上伏壯士圍堵約候王入呼千歲即下鐵板拔橋謀定乃遣人請王入撫諭王乘肩輿張蓋率勁騎數人渡橋直至城下比入門幾中其計鐵

板傷王馬首遂棄輿從馬走走至橋橋不可動王遂脫大怒下令礮其城城且壞鉉書高皇帝神牌懸城上師不敢擊鉉每出不意募壯士突擊北兵皆破之姚廣孝進曰師老矣遂還北平○八月戊申濟南圍解鉉遂及盛庸等復德州燕將陳旭遁歸北平兵勢大振朝廷擢鉉爲兵部尚書贊理大將軍事封盛庸爲歷城侯○九月朔詔盛庸督諸將北伐命副將軍吳傑進兵定州都督徐凱等屯滄州○冬十月燕王聞盛庸北取滄州乃陽下令征遼東諸將士不遠至通州張玉朱能等聞士卒晏怨請問曰遼地寒早士卒難堪今重兵壓境而勞師遠出恐非利王屏人語玉等曰不然善攻者當量其

堅瑕之勢今敵將各提兵分駐欲犄角我爲也顧德城頗堅敵衆所聚盛庸守之定州修築已完城守粗備吳傑平安守之攻未易下惟滄州城圯日久值地冰天又雨雪泥淖徐凱陶銘等築未能便茸今佯言征遼以示彼無南意我因其怠偃旗捲甲急趨攻之可滅此而後朝食也矢今不取他日守備城完難以爲力且機事貴密故未與衆知之玉等曰善徐凱等謀知燕兵以東果不爲備遣軍四出伐木晝夜督工修城王過直沽語諸將曰彼所慎者惟青縣長蘆今埽兒鼉兒坡數程無水彼亦不守此可徑越至滄州城下是夜三鼓起程一晝夜三百里遇偵卒盡殺之食時掩至滄州凱猶不知

督軍運上築城如常及燕兵薄城始覺亟命分守城堞衆皆股栗不能甲燕兵四面急攻麾將士由城東北肉薄而登踰時遂拔其城先遣兵斷其歸路生擒凱及都指揮俞琪趙許胡原等斬首萬餘級餘衆悉降燕將譚淵盡坑殺之械凱等趨北平○冬十二月盛庸移營東昌燕師次臨清遂攻東昌庸等聞燕兵且至推牛犒將士誓師厲衆簡銳背城而陣且列火器礮弩以待王謂諸將曰彼旣乏糧而出東昌素無積蓄其何所恃乎易之又燕士卒乘屢勝氣驕及見庸騎即鼓噪而前燕兵爲火器所傷死者甚衆會平安兵亦至與庸兵合遂大戰斬燕大將都指揮張玉於陣騎兵多棄甲而降庸遂



終兵圍王數重燕將朱能周長率胡騎奮擊其東北角  
於是西南抽兵漸薄王躍馬突出得免丙辰復戰擊斬  
燕衆萬餘人王退駐館陶盛庸飛檄真定滄德諸將水  
陸犄角邀王歸路是戰也成祖危益甚先是建文君遣  
將戒軍士曰燕王朕叔父也必不得已生致之不可加  
害令朕他日有殺叔父之名以故成祖每挺身臨陣雖  
短兵接戰莫敢輒以矢刃加成祖騎射尤精至是兵敗  
猶以一騎殿追者數百人不敢近高煦領指揮筆聚等  
兵遇庸部下指揮常棣等數人擊破之執常棣還成  
祖喜以高煦類已甚愛之

